

莆陽比事

莆陽比事卷之三

龍坡李俊甫幼傑纂輯

御筆賜字詔書不名

蔡襄皇祐五年間摹寫真宗聖製奉神述既成御
筆賜字曰君謨襄進詩謝上詔答云省所進古詩
一首爲御筆賜字君謨者朕昔日罷朝間燕多以
經史書藝頤神因見唐高宗賜戴郝李崔四臣之
字旨義皆有誨諭卿詞令根于溫厚筆力極于神

妙名以本其所贅字以伸其所輔偶御毫而援翰
俾中璫而特賜良以將厚意表殊寵也敷陳謝懇
發爲詩文重增嘉歎襄勒石序云歷考故事未有
列官侍從而宸毫賜字不緣名品而象服及親獨

臣恩榮前無此例

見賜字碑象服
及冠帔事見後

陳俊卿字應求淳熙九年以少傅致仕十一年十
月上以俊卿生日遣使賜手詔云卿垂車梓里諒
多燕適眷言舊弼渴想良深誕序將臨耆艾可慶

賜卿金器香茶至可領也式彰異數徃續茂齡其
益保頤以昌壽祉故茲親禮宜體至懷題曰付陳
少傅而不名俊卿摹刻于石叙云昔唐代宗之於
郭子儀本朝太宗皇帝之於呂端一以社稷元勲
一以太平名相若時體貌度越曩章顧臣何人敢
當此禮

手詔
刻石

荔陰孫子楊葉弟兄

方慎從字惟之登景德第守嘉州日嘗于公圃手

植荔枝賦詩有留取清陰待子孫之句大觀中曾
孫禧以殿中侍御史持節蜀部巡歷至嘉父老尚
有能誦其詩爲禧賀者

都官墓表
殿院行狀

林藻與弟蘊俱擢唐第名勳京師歸經梨嶺題詩
云昨向嶺頭題姓字不穿楊葉不言歸弟兄各折

一枝桂還向嶺頭睽影飛

閩川名
士傳

冲晦先生褒光處士

徐復字復之一字希顏寅三世孫博學尤長于易

康定中元昊復叛詔求有文武才可用者叅政宗
綬以復薦仁宗召見崇政殿訪問世務命講易初
終四卦又問今歲值何卦西兵何如復對歲值小
過而太一守中官兵宜內不宜外

詳見卦推西夏
條

命以官固辭乃官其子留復登聞鼓樓歲餘求歸
禮以束帛賜號冲晦先生東歸遊杭之萬松嶺因
居焉每與林和靖往來杭人稱二處士翰學沈邁
榜所居曰高士坊太守蒲宗孟題其舊隱云冲晦

先生不屑官布衣謁帝布衣還尚嫌姓字騰人口
惟恐文章落世間大隱不妨居市井高吟何處問
家山平生客意江湖上雲自無心水自閒

龍川志
石林避

暑錄通
鑑長編

張弼字舜元操尚介潔不求聞達嘗謂易學久晦
乃盡去傳註獨誦繫詞二十年一日釋然而悟引
鼓自撾于是著成一家之說紹聖二年尚書省以
其書上詔付秘書省賜號葆光處士三年部使者

以方臨等舉狀奏聞勅授泉州教授告詞云大臣
言爾行義尤深于易學官考所著書發明象數出
于自得從臣部使者繼以爾言宜命以官往職訓
導時弼年六十餘矣

實錄人物志黃穎所作弼傳
黃震易解序紹聖奏劄語詞

出參

湘鄉門人艾軒弟子

鄭厚字景常一字叔文號湘鄉先生

以官終湘鄉
令故云

舍法行學者宗王氏新義文格卑弱厚推原古意

叅以時事雖場屋之文亦有經世之術詞賦典麗
秀傑追琢坡谷閩中士子一經指教皆爲當世聞
人龔公茂良嘗謂吾莆文字以湘鄉爲開山祖既
第之後執經問業不離左右厚嘗考試福州一時
名士如林之奇陳誠之鄭鏐李樗之孟仲叔季皆
在選中人謂三山名士一網打盡表所居曰名賢
坊

耆舊紀聞
游洋志

林光朝號艾軒先生以聖賢踐履之學爲己任窮

經討古浩然自得四方樞衣從學者歲率數百人
乾道淳熙間莆中名士多出其門丞相周益公誌
其墓云始予與劉賓之同年進士暨仕于朝識陳
正獻公賓之博洽剛介正獻道德隆重每論莆中
人物賓之曰艾軒吾師也正獻曰艾軒吾益友也
後見七閩之士人人喜稱艾軒方奏名南宮時朋
友門弟子宦達已多徃徃交賀于朝以其有所抱
負庶因仕以行道也艾軒歿後莆人同請于郡立

祠城南每歲春秋太守率諸生有事祠下一郡之人莫不奔走起敬郡爲榜其居曰師儒坊

陳正獻
撰祠堂

記周益公撰
墓志參出

唐家遺裔孔聖諸孫

李丹唐宗室蔡王尉八代孫以朝議郎祠部郎中
爲饒州刺史貶泉州莆田令卒于官州刺史王審
珪銘其墓曰崑山玉碎漢水珠沉天喪賢宰號慟
民心子孫因家于後埭子崇校書郎朱梁受禪李

氏仕者志易告身崇歎曰吾寧能爲劉國師耶遂

棄官歸曾孫忻與弟歆列仕皇朝俱至侍從歐陽

公修唐史自忻歆諸子而止並列名宗室表今其

裔多登科者

唐書表國朝實錄通鑑長編家傳參出

又江王元祥

之孫藋

游洋志云子誤

則天時寓泉之南安藋孫隴西公

楚珪嘗爲雲麾將軍後又自南安徙居興化縣之

西平遂爲西平李

游洋志謂其先有封西平王者誤按西平東平皆地名唐表別

有西平王

乃藋王子郡志又載江王之後有曰翔者尉莆田

遂因莆田家焉今子孫多錯居于郡

按唐表云翔即蔡之四代

也孫

孔仲良宣聖三十八代孫唐以儒林郎守泉州莆
田令因家于涵頭有寶歷二年告身尚存裴度書
押周益公朱晦庵題跋仲良裔孫幼夏嘗修孔傳
纂闕里祖庭記本家雜記猶子孚又今祀郡學香
火

忠惠之家孝友之門

蔡襄故家在郡南五里淳熙三年賜謚忠惠郡爲
表其坊曰忠惠之家王龜齡有過端明故里詩云
懷章南過蔡公鄉駐馬遙瞻數仞墻丹荔株株經
品藻喬松葉葉惠清涼四賢詩出入爭氣三諫章
成國有光真是濟川三昧手清源遊戲作虹梁

公謂

字泉日作
洛陽橋

林攢唐真元間爲福唐尉親死廬墓感白鳥甘露
之祥廉使李若初上其事詔賜雙闕以旌其廬時

號闕下林家今所居曰孝友坊貞元旌表林氏里
曰孝義里王龜齡過其居詩云唐室遙遙孝友門
屹然雙闕至今存當時但下思親淚不爲恩波及

子孫

唐史孝友傳閩川名士傳歐陽詹甘露述

艾軒舊莆志序云太

守鍾離公松偶一日道人物山川且欲按圖而求
之以縣北三里有故家爲林氏出南郭可五里蔡
端明有舊第熟視雙闕者不覺斂容遇蔡公之門
或立馬徘徊不忍去以南北通途數里乃得此若

求之井邑聚落所得又益多此圖經所由出也

郭義仲遊太學聞母喪跣足三千里哭輟嘔血家
貧甚及治喪雖故人有饋不肯受聚土爲墳廬其
傍赫日方中甘露霏霏而下郡以聞于朝有旨旌
表其閭淳熙重榜其門曰紹興旌表郭氏義重六
試禮部得官再調德慶錄叅卒艾軒記其事曰一
夫以孝聞天子爲之改容且至大書其門以褒勸
旌異之莆之東北隅惟林氏爲故家雙闕今無恙

南北衝

道衝

由是出必立馬停轡而後去三百年來

有郭君孝子視昔人無愧色云

郡志並家傳恭出

附見

黃大器興化人事親孝芝產于廬者三鄭夾漈爲

文記之

游洋志

黃琮喪母哀毀不食甘露降于總

帷三日

人物志

黃提舉國鎮之子希閔廬父墓人

號爲孤廬黃家

太學生彭受廬墓有白鵲之祥

郡表其坊曰孝行卓異

並蒨田人

弟兄入館師生齊名